

REVISTA SITUASAUN – ABRÍL 2016

ASUNTU NE'EBÉ PRESIZA TAU ATENSAUN

- ▶ **Insidente Envolve Eis-Membru Grupu Arte Marsiál (GAM), Uza Rama Ambon no Ataka Husi Ema Deskoñesidu Akontese Nafatin iha Kapitál Dili;**
- ▶ **Programa Sukat Rai Husi Sistema Nasionál Cadastral (SNC) Hamosu Violénsia iha Komunitade;**
- ▶ **Insidente Violénsia Komesa Mosu iha Rai Laran Liga ho Atividade Konsolidasaun Partidu Polítiku iha Baze.**

INSIDENTE ENVOLVE EIS-MEMBRU GRUPO ARTE MARSIAL (GAM), UZA RAMA AMBON NO ATAKA HUSI EMA DESKOÑESIDU AKONTESE NAFATIN IHA KAPITÁL DILI

Belun ho nia Sistema Atensaun no Responde Sedu (AtReS) iha fulan Abril rekolla insidente violénsia hamutuk 11 husi total 109, ne'ebé iha ligasaun ho eis grupu arte marsiál (GAM) no insidente 11 ne'e akontese iha Dili laran. Karakterístiku importante husi insidente violénsia ne'e mak hanesan, iha ema balun envolve iha eis GAM, entaun bainhira akontese ona problema sempre bolu nia maluk membru GAM husi fatin seluk ba asaltu malu. Insidente ho karakterístiku hanesan ne'e 3 akontese iha Mascarinhas, 7 iha Bairro Pite no 1 akontese iha Fatuhada.

Asalta fíziku husi ema deskoñesidu ne'ebé uza fatuk no rama ambon hamutuk insidente 10 mak akontese iha fulan Abril, ne'ebé insidente 5 akontese iha Dili laran. Liga ba insidente violénsia uza rama ambon hodi halo ataka ba ema seluk, iha insidente 2 mak akontese iha Dili hanesan iha loran 14 Abril, maizumenu tuku 07.00 kalan iha Aldeia Lurumutu, Suku Fatuhada, grupu ida joga karta no hemu tua hamutuk to'o ikus tanba lanu no lakon depois la simu malu, nune'e fila ba uma foti rama ambon no tenta hana ida seluk, maibé viziñu sira mak kontaktu ba Polisia hodi halo intervensaun. Insidente ida seluk mós akontese iha Fatuhada, iha Aldeia Zero Dois iha loran 16 Abril, maizumenu tuku 10.30 kalan, ne'ebé grupu deskoñesidu hana joven ida iha nia hirus matan. Insidente ne'e akontese iha besik fatin festa nian ida no joven ne'e mate bainhira lori ba Hospital Nasionál Guido Valadares (HNGV). Iha mós atake husi ema deskoñesidu ne'ebé iha indikasaun envolve eis-membru Grupu Arte Marsiál (GAM).

PROGRAMA SUKAT RAI HUSI SISTEMA NASIONAL CADASTRAL (SNC) HAMOSU INSIDENTE VIOLÉNSIA IHA KOMUNIDADE

Totál Insidente Violénsia iha Abril 2016	
Munisipiu	Insidente
Aileu	3
Ainaru	6
Baukau	9
Bobonaru	3
Covalima	5
Dili	40
Ermera	6
Lautein	6
Likisá	3
Manatutu	10
Manufahi	1
Oekusi	6
Vikeké	11
Totál	109

Iha Abril mós rekolla insidente violénsia 8 mak akontese liga ba política sukat rai husi Sekretáriu Estadu Terras no Propriedade. Insidente akontese bainhira ekipa husi Sistema Nasionál Cadastral (SNC) tun ba baze atu sukat rai, mak hamosu insidente violénsia entre comunidade sira. Insidente liga ba programa sukat rai husi SNC sa'e ba insidente 8, ne'ebé 4 akontese iha Postu Administrativu Ossu, Munisipiu Vikeké, 3 iha Postu Administrativu Laleia, Munisipiu Manatutu no 1 iha Postu Administrativa Baukau, Munisipiu Baukau. Karakterístika importante husi insidente violénsia sira ne'e mak maun-alin ka família sira hadau malu sukat rai eransa nian bainhira ekipa SNC ba baze sukat rai. Iha família balun halo impedimentu ba família seluk atu sukat rai no la konkorda ho baliza rai, nune'e sira hakesuk malu, tarata malu no baku malu hodi estraga relasaun entre família.

Maske número ne'e konsidera kí'ik kompara ho fulan Abril 2015 ne'ebé hamutuk insidente 10, maibé programa ne'e nafatin hamosu konfliktu foun iha comunidade. Iha fulan Janeiro – Marsu 2016, rekolla dadus insidente 2 de'it mak liga ho servisu SNC, ne'ebé ida akontese iha Postu Administrativa Laclo, Manatutu no ida akontese iha Postu Administrativa Pante Makassar, Rejiaun Administrativa Oekusi.


INSIDENTE VIOLÉNSIA KOMESA MOSU IHA RAI LARAN LIGA HO ATIVIDADE KONSOLIDASAUN PARTIDU POLÍTIKU IHA BAZE

Tuir dadus ne'ebé rekolla husi sistema AtReS hatudu katak insidente violénsia liga ho konsolidasaun partidu polítiku hamosu ona insidente violénsia 3 iha Abril 2016 no insidente violénsia 2 iha Fevereiro 2016.


Iha loran 16 Abril, maizumenu tuku 08.00 kalan iha Aldeia Aikurus, Suku Tulatakeu, Postu Administrativa Remexio, Munisipiu Aileu akontese grupu ida tuda militante partidu polítiku ne'ebé fila husi Dili hafoin kompras tiha sasan ba preparasaun konsolidasaun partidu iha Aileu. Grupu ne'ebé refere tuda militante sira no kauza ema balun kanek. Insidente ida seluk akontese iha Aldeia Baha Neo, Suku Liaruka, Postu Administrativa Ossu, Munisipiu Vikeké iha loran 10 Abril, iha tuku 06.00 lokraik joven balun tuda militante partidu ida ho fatuk no kauza kanek iha ulun. Enkuantu insidente ida seluk akontese iha Aldeia Laikara, Suku Maina 2, Postu Administrativa Lautein, Munisipiu Lautein iha loran 30 Abril maizumenu tuku 03.00 lokraik, joven balun ameasa no tenta tuda militante partidu ne'ebé fila husi konsolidasaun tanba partidu ne'e hatún dignidade ka ko'alia aat partidu seluk. Monitorizador Belun no Lider Lokál sira mak halo intervensaun no akalma insidente ne'e.

KARATERÍSTIKA INCIDENTE


Total Incidente: Abril 2016




Insidente Fatin




Metodu Violensia






Tipu Violensia



See Mak Hahu / Halo Violensia?





ATIVIDADE PREVENSAUN NO RESPONDE BA KONFLITU

Atividade Ne'ebé Hala'o Husi Ekipa Sistema Atensaun no Responde Sedu (AtRes)

- ▶ ONG Belun liu husi Rede Prevenaun no Responde Konflitu (RPRK) Postu Administrativa Pante Makassar, Rejiaun Administrativa Oekusi iha loron 01 Abril 2016 hala'o Tara Bandu atu prevene konflitu no violensia entre Estudante no Juventude. Serimónia kulturál ne'e realiza relasiona ho insidente violensia ne'ebé aumenta iha Suku Costa, Pante Makassar. Serimónia kulturál ne'e participa husi Representante Sekretáriu Rejiaun ba



Asuntu Sosiál no Edukasaun, Komandante PNTL Rejiaun Oekusi, Komandante F-FDTL, Administradór Postu, Komandante PNTL Eskuadra Pante Makassar, Diretór Sira, Representante CRAM, Lider Lokál, Joven no Estudante sira.



▶ Treinamentu ba Belun nia monitorizador sira no Koordinadór Munisipiu hodi reforsa koñesimentu di'ak liu tan ba sistema monitorizasaun no mós papél no divizaun PNTL no F-FDTL no violénsia eleitorál. Treinamentu ne'e akontese iha loron 6-8 Abril 2016 iha Tower Fatuhada Dili. Programa ne'e realiza tanba suporta husi Komisaun Europeia no UNDP-Timor Leste;



▶ Treinamentu kona-ba Tráfiku Umanu husi IOM Timor Leste realiza iha loron 11-12 Abril ba Koordinadór Munisipiu no Monitorizador husi Dili no Oekusi, inklui ekipa Jestor AtReS. Treinamentu ne'e ho objetivu prinsipál katak sistema AtReS mós bele koleta dados liga ba Tráfiku Umanu iha Postu Administrativu 43;



▶ Iha loron 26 to'o 29 Abril, NGO Belun nia ekipa Atensaun no Responde Sedu (AtReS) partisipa iha treinamentu ida ne'ebé fasilita husi Konsultór Scott Cunliffe. Treinamentu ne'ebé hala'o iha Timor Plaza ne'e suporta husi Uniaun Europa no UNDP. Objetivu husi treinamentu ne'e mak hametin liu tan ekipa nia kapasidade atu iha planu di'ak ba sistema AtReS no mós analiza dados ne'ebé ekipa simu kada fulan, no mós aumenta impaktu ba ekipa nia responde ba konflitu ne'ebé identifika.



Atividade Ne'ebé Hala'o Husi Ekipa Mediasaun no Rezolusaun ba Disputa Rai (MRDR)

▶ Durante fulan Abril 2016, Ekipa MRD koopera hamutuk ho DTPSC Baucau fasilita mediasaun ba disputante na'in 3 ba parsela rua (2) entre ema na'in ida hasoru ema na'in rua ba rai ketan rua, ne'ebé lokaliza iha Suku Tirilolo, Postu Administrativa Baucau, Munisipiu Baucau. Prosesu mediasaun ne'e la'o di'ak, maibé seidauk iha solusaun ikus tanba opsaun ne'ebé hato'o husi reklamante katak sukat tuir ida-idak nian, maibé husi parte deklarante na'in rua ne'e sei halo diskusaun ho familia depois mak bele mediasaun fali ba faze segundu.

Atividade Ne'ebé Hala'o Husi Ekipa Programa Apoiu Polisiamentu Komunitária (PAPK)

▶ Iha loron 26 Abril 2016, iha Suku Uani Uma, Postu Administrativa Uatucarabau, Munisipiu Vikeké realiza planu asaun kona-ba Lejizlusaun Rai Nian no. 1/2013. Objetivu husi atividade ne'e mak hasa'e koñesimentu no prevene konflitu liga ba disputa rai. Atividade ne'e hetan Fundu Seguransa husi Programa Apoiu Polisiamentu Komunitária (PAPK). Total partisipante iha atividade ne'e hamutuk mane na'in 86 no fetu na'in 29.

KONA-BA REVISTA NE'E

Revista situaun ne'e relata kona-ba asuntu xave relaciona ho insidente violénsia no tendénsia konflitu husi koleasaun dados monitorizasaun liuhosi Sistema Atensaun no Responde Sedu (AtReS), kobre iha Postu Administrativu 43, husi postu 65, suku 208 iha Timor-Leste durante Abril 2016. Belun esforsu atu fahe informasaun ne'ebé up-to-date no serteza ho dados atuál. Hanoin katak, bele hetan mudansa situaun ho lalais husi kontribuisaun dame ita hotu nian. Ami agradese no simu informasaun seluk ne'ebé bele klarifika ka update dados ne'ebé ami iha, liuhosi sistema AtReS.

Marilia Oliveira da Costa, Jestor Sistema AtReS: bylah.belun@gmail.com

Laurensius Lein, Espesialista Prevensaun Konflitu & Polítika: laurensius.belun@gmail.com